

- 1' Mancher der stelt noch geistlicheyt
- 2' Der an düt pfaffen / klosterkleyt
- 3' Den es berüwt / vnd würt jm leyt



Von geystlich werden

- 1 Noch hat man anders yetz gelert
- 2 Das ouch jnns narrenschiff gehört
- 3 Des düt sich bruchen yederman
- 4 Jeder buwr / will eyn pfaffen han

2' klosterkleyt] klosterkkeyt *GW5046*

5 Der sich mit müssig gon erner
 6 On arbeit leb / vnd syg eyn her
 7 Nit das er das tûg von andacht
 8 Oder vff selen heil hab acht
 9 Sunder das er mög han eyn herren
 10 Der all syn gschwister mög ernerer
 11 Vnd loßt jn wenig dar zû leren
 12 Man spricht / er mag licht dar zû können
 13 Er darff noch grösser kunst nit synnen
 14 Echt er eyn pfründen kan gewynnen /
 15 Vnd wigt / priesterschafft so gering
 16 Als ob es sy eyn lychtes ding
 17 Des fyndt man yetz vil junger pfaffen
 18 Die als vil können als die affen
 19 Vnd nement doch selsorg vff sich
 20 Do man kum eym vertrüwt eyn vich
 21 Wissen als vil von kyrch regyeren
 22 Als müllers esel kan quintyeren
 23 Die Byschöff die sint schuldig dran
 24 Sie solttens nit zûm orden lan
 25 Vnd zû selsorgen vor vß nüt
 26 Es werent dann gantz dapferlüt
 27 Das eyner wer eyn wiser hyrt
 28 Der nit syn schoff mit jm verfür
 29 Aber yetz wänent die jungen laffen
 30 Wann sy alleyn ouch werent pfaffen
 31 So hett jr yeder was er wolt
 32 Es ist für war nit alles golt
 33 Das an dem sattel ettwan glyßt
 34 Mancher die hend dar an beschisßt

22 quintyeren *GW5047* | qwintyeren *GW5041* | quinttyeren *GW5046*

35 Vnd loßt sich jung zů priester wyhen
 36 Der dann sich selb dūt maledyen
 37 Das er nit lenger gbeitet hat
 38 Der selben mancher bättlen gat
 39 Hett er eyn rechte pfründ gehan
 40 Ee er die priesterschaft nam an
 41 Es wer jm dar zů kumen nitt
 42 Vil wyht man / durch der herren bitt
 43 Oder vff diß / vnd jhenes disch
 44 Dar ab er doch ysßt wenig visch /
 45 Man lehnet brieff eynander ab
 46 Do mit / das man eyn tyttel hab
 47 Vnd wānen den bischoff betriegen
 48 So sie mit jrm verderben lyegen
 49 Keyn armer vych vff erden ist
 50 Dann priesterschaft / den narung gbrist
 51 Sie hant sunst abzüg vberal
 52 Bischoff / Vicary / vnd Fiscal
 53 Den låhenherrn / syn eygen fründ
 54 Die kellerin / vnd kleyne kynd
 55 Die geben jm erst rechte büff
 56 Das er kum jnn das narren schyff
 57 Vnd do mit aller freüd vergeß /
 58 Ach gott / es halttet mancher meß
 59 Do weger wer er ließ dar von
 60 Vnd rürtt den altter nyemer an
 61 Dann gott acht vnsers opfers nycht
 62 Das jn sünden / mitt sünden geschicht
 63 Zů Moysi / sprach gott der herr
 64 Eyn yedes thier / das mach sich verr

65 Vnd rûr den heyligen berg nit an
 66 Das es nit grosse plag muß han /
 67 Oza der angerüret hett
 68 Die arch / des starb er an der stett /
 69 Chore das wyhrouch vasß rûrt an /
 70 Vnd starb / Dathan vnd Abyron /
 71 Das gwihte fleisch schmeckt manchem wol
 72 Der wermt sich gern by kloster kol
 73 Dem doch zû letst würt für vnd glût
 74 Verstanden lüten ist predigen gût /
 75 Man stosßt manch kynd yetz jn eyn orden
 76 Ee es ist zû eym menschen worden
 77 Vnd es verstand / ob das jm sy
 78 Gût oder schad / stäckts es jm bry
 79 Wie wol gût gwonheyt bringet vil
 80 Ruwt es doch manches vnder wile
 81 Die dann verflûchen all jr fründt
 82 Die vrsach solches ordens syndt
 83 Gar wenig yetz jnn klöster gont
 84 Jn solcher állt / das sie es verstont
 85 Oder die durch gotzwillen dar
 86 Kumen / vnd nit me durch jr nar
 87 Vnd hant der geistlicheyt nit acht
 88 All ding dûnt sie dann on andacht /
 89 Vor vß jn allen örden gantz
 90 Do man nit halttet obseruantz
 91 Solch kloster katzen sint gar geyl
 92 Das schafft man byndt sie nit an seyl /
 93 Doch lychter wer keyn orden han
 94 Dann nit recht dûn / eym ordens man